

**Date – 17/11/2024**

**Time - 7:30 -7:40Hrs**

## **REGIONAL NEWS BULLETIN**

### **HEADLINES (MORNING)**

1. Tunhnaia Manipur buaina kaihnawihah Mizoram chhunga hnam leh hnam inhmelmakna tichhuak thei tur zawnga hma la lo turin Mizoram sorkarin mi tin a ngen.
2. Chief Minister Pu Lalduhoma'n Bana Kaih hnuaiah zirnaa hlawhtling lo, theihna leh thiamna kawng dang nei si te tan ruahmanna an siam tih a sawi.
3. Agriculture Minister PC Vanlalruata'n sawrkarin thlai chi pali hralhna man a bituk aia hniama kuthnathawktuten an hralh loh nan ruahmanna siam vek tawh a ni, a ti.
4. Prime Minister Narendra Modi-a chu ni ruk thangin Nigeria, Brazil leh Guyana-ah te a zin dawn.

<><><>

## **MIZORAM GOVERNMENT PR ON MANIPUR**

Tunhnaia Manipur buaina kaihnawihah Mizoram chhunga hnam leh hnam inhmelmakna tichhuak thei tur zawnga hma la lo turin Mizoram sorkarin mi tin a ngen.

Manipur tualchhung buaina chungchangah hian Mizoram sorkar chuan thuchhuah siamin, Mizoram chhunga hnam dang, a bikin Manipur state-a mite himna turin Mizoram sorkar chuan hma a la zel dawn a; chutiang bawkin Mizoram pawna cheng Mizote, a bikin Manipur-a zirlaite leh hna thawka awm te himna turin Mizoram sorkar chuan hma a la chhonzawm zel dawn a ni, a ti a. Manipur-in kum 1 chuang tualchhung buaina a tawh mek chu titawp tura hma la chhuzawm zel turin Manipur sorkar leh sorkar laipui Mizoram sorkar chuan a ngen a ni.

Tun hnaia buaina chhuak avanga nunna chan leh hliam tuar engemawzat an awm chu pawl a tih thu Mizoram sorkar chuan a tarlang a. Buaina avanga hliam tuar leh nunna chante leh an chungte zawng zawng a tuarpui takzet tih a tarlang bawk. He buaina avanga Manipur atanga Mizorama sahimna zawng mi engemawzatrawn lutte chu Mizoram sorkar leh mipuiten theihtawp chhuahin chhawmdawl hna an kalpui mek, a ti.

Hetihlai hian, Mizo Zirlai Pawl, MZP chuan Manipur sorkarin an state chhunga Meitei firfiakte a khuahkhirh theih hma chu an State-a Science leh technical institution hrang hranga Mizoram seat-te chu institution dangah behtir turin sorkar laipui an phut tih an sawi a. Manipur khawpui Imphal-a Mizoram atanga lehkha zira awmte'n Meitei kut an tawrh loh nana hma la turin sorkar laipui an phut tih an thuchhuahah an tarlang a ni.

Manipur state Jiribam-a CRPF ten an kahhlum nia sawi Zohnahthlak mi 10 te ruang chu Silchar Medical College atangin nimin chawhnu khan sorkar laipui ruahmannain Lamka phurh thlen an ni.

(DIPR/PR)

<><><>

## AGRI. MINISTER PC VANLALRUATA

Agriculture Minister PC Vanlalruata'n sawrkarin thlai chi 4 hralhna man a bituk aia hniama kuthnathawktuten an hralh loh nan ruahmanna siam vek tawh a ni, a ti.

Agriculture Minister hian sawhthing, hmarcha, aieng leh hmunphiah man tur sawrkarin a bituk aia hniama kuthnathawktuten an hralh loh nana hma lain theihtawp chhuah a ni, a ti a. Mipui hrilhriatna pawh district tinah kalpui a ni tawh a, kuthnathawkte chu an hriat tur pawimawh hrilh zel an ni ang, a ti.

Pu PC Vanlalruata chuan thlai hralhnaah sawrkar inrawlh kher a ngai lo maithei tih sawiin kuthnathawktuten an thlai thar an hralhna turah hma lak a ni, a ti a. A man bithliah aia tlawm lova an hralh ngei theih nan sawrkar chuan ruahmanna a kalpui mek a, sawrkarin a man a bithliah aia toa hralhna a awm anih chuan thlai hralhnaah sawrkar a inrawlh a tul dawn lo niin a sawi bawk.

Minister chuan kuthnathawktuten sawrkar rate aia tlawma thlai an hralh an remti dawn lo tih sawiin, an rate aia tlawm baka hralhna a awm lo a nih chuan sawrkar a inrawlh dawn, a ti a. Sawrkarin Minimum support price a pe dawn tih sawiin hemi atan hian sawrkarin pawisa a nei vek tawh, a ti a. Sawrkarin thlai a lei a ngaih thulha thlai dah khawmna tur pawh an ruahman sa a ti bawk.

(Corr)



## CM – HAND HOLDING

Chief Minister Pu Lalduhoma'n Bana Kaih hnuaiah zirnaa hlawhtling lo, theihna leh thiamna kawng dang nei si te tan ruahmanna an siam tih a sawi.

He thu hi nimina Govt. Gandhi Memorial High School, Champhai, kum 75 tlin lawmna lungphun a hawnnaah sawiin Chief Minister chuan, zirnaah mi tin an thleng sak vek thei lo, a ti a. Zir sang lo mi hlawhtling tam tak an awm tih sawiin sawrkar flagship program Bana Kaih hnuaiah zirnaa thleng sang lo, theihna sang tak nei leh thiam thil nei tan kawng an hawnsak dawn, a ti a. Zirlaite chu thiam thei lo an nih pawhin beidawnga sual kawng zawh mai lova, hlawhtling tak ni turin kawng tinrenga taima turin a chah a ni.

Govt GM High School Platinum Jubilee lawmna pui ber hi karleh ni 21 leh ni 22 khian he school-a lo zir chhuak tawh Home Minister Pu K. Sapdanga hova hman a ni dawn a ni.

(Desk)



## EX- CM ZORAMTHANGA

Chief Minister hlui Pu Zoramthanga'n ZPM sawrkar tharin Airport, ZMC leh thil dang hralh a tum thawm awm chho zel chuan an mangang hle tih a lantir, a ti.

Aizawl East MNF Block Extended meeting nimina Aizawla neih a hmanpuinaah he thu hi sawiin MNF President Pu Zoramthanga chuan, kalphung thar sawrkar chu mipui ten an hre Chiang chho hle a, SASCI hna leh sum awmsa pawh ZPM sawrkar thar chuan an ipteah an ak tawp ringawt a ni ber a, sanction a nihna ang pawha hmang lovin, SEDP sum Cheng Vibch. 150 leh SASCI sum Cheng Vbch. 230 te kha a petute pek chhan ni lo sawrkar hna thawk hlawhah te an pe ta ringawt mai a, Central-in hnathawhna tura a sanction tawh, an duh duh dana a pawhsawih avangin Court emaw Central sorkar emaw hian a guideline anga an tih loh vangin state sumin a rulhtir a nih chuan Mizoram sum lama a hmachhawn tur chu a namai dawn lo hle a ni, a ti.

(PR)



## CATHOLIC

Aizawl Bishop hnuaia awm, Catholic Mipa Pawl inkhawmpui vawi 2-na neih mek a ni.

Aizawl Diocese pum huap Catholic Mipa Pawl (CMP) inkhawmpui vawi 2-na hi Kolasib-a St. Joseph the Worker Church-ah nghah a ni a, zanin hian a tiak ang. Inkhawmpui thupui atan hian ‘I ram lo thleng rawh se’ tih hmangin Rev. Fr. James Zodinliana’n thu a sawi a, Aizawl Bishop Most Rev. Stephen Rotluanga, CSC DD chuan inkhawmpui hi a hmanpui ani.

Diocese huapa Catholic Mipa Pawl (CMP) enkawltu Laity Commission Secretary Rev. Fr. John Zoduhsanga chuan Diocese huap anga Catholic Mipa Pawl din a nih tur thu leh Dan bu tlangzarh a nih dawn thu a puang.

Nimina Mass Thianghlim inkhawm banah CMP hmingin luanchhuah Program hman a ni a, hetah hian dam lo enkawl ngai mi pahnih leh District Hospital, Kolasib, Salvation Army enkawl Enna In, St Joseph’s Minor Seminary leh MC Sister Home te tlawhin thilpek hlan a ni.

Vawiin chawhma dar 10-ah Iukaris Thianghlim hmanga inthawina neih a ni dawn a. Aizawl Bishop Most Rev. Stephen Rotluanga CSC DD chuan Mass thianghlim a hlan ang.

(Andrew Vanlalauva Kolasib PTC)



## PM MODI

Prime Minister Narendra Modi chuan Nigeria, Brazil leh Guyana ram te a tlawh dawn a, nizan khan Abuja a thleng. Prime Minister chuan a thuchhuahah Nigeria chu Africa chhim lam biala India thawhpui hnai tak a nih thu a sawi. Democracy leh pluralism rinna inang tlanga inngat Strategic Partnership tihnghehna hun remchang a nih tur thu a sawi.

PM Modi hi Troika member angin G-20 Summit vawi 19-na-ah a tel dawn bawk a, “One Earth, One Family , One Future” tih an thupui chungchang sawiho a nghahhlelhawm thu a sawi bawk.

A hnukung berah PM Modi chuan President Mohamed Irfaan Ali sawmna angin Guyana a tlawh dawn a. Heihi kum 50 chuang chhunga India Prime Minister-in a tlawh hmasak ber tur a nih thu a sawi. An inhmuh chhung hian hrulaitu pahnihte hian an inzawmna danglam tak, nunphung leh hlut zawng inang khat ram pahnihte c chu thawh dun dan tha leh an ngaihndan an sawidun dawn a ni.

News On Air

